

PARLACHE D'AMISSES

Lire tout haut aide à comprendre

El cul tourniau du présidint d'Lamain

Dernier dimèche du mois d'juillet, nos avines décidé d'fai l'randonnée de l'Moinette. Rendez-vous à huit heures su l'plache d'Tourpes avec Daniel Guéret, el présidint d'Lamain Sport. Quand j'su d'allé à l'brasserie pou porter l'obole du groupe, à l'plache de l'tente et des tables dressées au mitan de l'cour, eine boîte aux lettres pédue au mur...

Texte PHILIPPE CARTON L'CINSIER LEUZOIS

Cha m'a fait tout drôle, j'n'ai nieu pu m'épécher d'arbusier deux ans én arrière, eine grande table avec el s'Audax, des bouchons d'Moinette qui spitintent in l'air. Aute cose comme ambiance et cha me rédoit eine miette nostalgique.

No vla démarrés à chonq, pas d'sous des gros nuaches mais sans plève. Pou cho qui est du paysache, on avoit c'méché l'août avé les variétés les plus précoces, on n'savoit nieu qu'el restant d'alloit garcenner. Les camps d'petotes étintent attaqués pa l'midiou, avec eine météo pareille, cha n'pouvoit êt autremé.



No ptit tour s'étoit passé sans problème. On arrivoit à Tourpes quand tout d'ein co, é passant d'vé ein tro, el présidint d'Lamain fait un cul tourniau arrière. Je l'suivois à un mètre, un moumé, j'ai péssé qu'i fsoit un malaise. S'tiète a buqué su l'tarmac au point que s'casque étoit féfé. Y s'a mis à gnoux, a fait mouvé s'dos pou vir si y n'avoit rieu d'rompu. Cha avoit l'air d'aller.

Un visin é veillant l'scène, étoit d'allé cai eine cayère. On l'a arlevé tout bellmé. Pédant qu'eine fème li mettoit des pansmés su s'nez qui sangnoit, on a ramassé les morciaux du veulo et c'est là qu'on a vu que s'vis d'selle étoit squettée.

C'est cha qui avoit provoqué s'chute

Quand Daniel a eu artrouvé ses esprits, nos sommes d'allé à l'forge, l'bistreet d'Tourpes. On a s'queu deux, trois Moinette. Cha a anesthésié eine miette l'douleur.

El lendmain, j'li ai téléphoné ; y étoit au fauteuil à mitan paralysé. Y pésoit s'armette su deux jours. J'li ai dit « **qu'au buzier ? A no n'âche, i faut l'temps pou qu'nos ochos artrouvent leu plache** ».

Malheureusmé, el sort d'alloit s'acharner sur li. On s'avoit mis d'accord pou d'aller à el Jubaru vtt. C'étoit l'occasion d'arvir les coumarates. Nos dvînes fai un tour su l'route. E montant l'antenne de Froidmont, y a attrapé em rwel arrière, le vla co par terre.

C'co chi, pu grave : clavicule squettée. Aux urgences, on li a mis eine attelle. Tout d'suite, j'li ai dit qui d'voit s'fair opérer, sinon y d'alloit d'veni sot. Six smaines sans ouvrir é pleine campagne d'bettraves, nieu possipe.

Huit jours après l'opération, y montoit dvé s'camion. J'vos rassure tout d'suite, cha n'a nieu trop étamé s'moral. Et vos étédrez co souvé s'grande babaille.



J'espère Qu'on s'rorverra su les routes l'année qui vié. Et qu'on ara co tamintes tournées d'plaisi.

El cinsier